



Сыр бойы



№63-64
(19741-19742)

Қызылорда облыстық қоғамдық-саяси газет

1929 жылдың 1 шілдесінен шығады

3 мамыр /ЖҰМА/ 2019 жыл



БІЛІМ/2

Алгебра сабағы



ҰЛЫ ЖЕҢІСКЕ - 74 ЖЫЛ/3

Майдангер



ҰЛТ ӨНЕРІ/4

Атсейіс

Бірлік – басты құндылық



Суретті түсірген Б.Есжанов

Еліміздегі татулық пен түсіністіктің жарқын мерекесі – Қазақстан халқының бірлігі күніне орай «Сыр сұлейлері» аллеясында ауқымды шара ұйымдастырылды. Оған облыс әкімінің орынбасарлары Қуанышбек Ысқақов пен Руслан Рүстемов, қала әкімі Нұрлыбек Нәлібаев қатысып, аймақ тұрғындарын ынталық күнімен құттықтады.

Айдана ЖУМАДИНОВА.

Шарада Қуанышбек Досмайылұлы тыныштық пен татулық, ұлтаралық келісімнің сақталуы қазақ халқының дархан пейілі мен Ұлт көшбасшысы саясатының жемісі екенін атап өтті. Қазір еліміздегі сан түрлі ұлттың бірлігіне, ұлтаралық татулықты нығайтуға қызмет ететін басты құрылым – Қазақ

стан халқы Ассамблеясы. Қоғамымызда алуан түрлі мәдениеттің тоғысуы, сенім мен сыйластықтың салтанат құруы елдің артықшылығы мен жетістігіне айналып үлгергені белгілі. Ал біздің облыста 11 ұлттық этномәдени бірлестік өкілдері қызмет етуде. Бұл күні «Сыр сұлейлері» ал-

леясында түрлі ұлт өкілдерінің қатысуымен концерт қойылып, қызылордалық өнер қайраткерлері мерекенің ажарын арттырды. Сондай-ақ, өткен жыл Қазақстанда Өзбекстан жылы деп жарияланса, биыл Өзбекстандағы Қазақстан жылы. Екі ел арасындағы достықтың нышаны ретінде Өзбекстаннан ар-

найы келген «Osioyo» өнер ұжымы Сыр даласын думанға бөледі.

Мерекеге орай аллеяда спорт түрлерінен сайыс, облыс орталығында қалалық филармония өнерпаздарының концерті ұйымдастырылса, «Шығармашылық Арбатта» қолөнер шеберлері халыққа авторлық туындыларын ұсынды.

СПАРТАКИАДА

Сыр спортындағы серпін

Қызылордада бокстан ерлер арасында Қазақстан Республикасының V жазғы спартакиадасы басталды. Облыс тарихында алғаш рет ұйымдастырылған жарысқа Нұр-Сұлтан, Алматы, Шымкент қалалары мен барлық облыстардан 17 команда қатысып, 10 салмақ дәрежесі бойынша 146 балғары қолғап шебері жұлдырықтасатын болады.

Мейрамгүл ДАУЫЛБАЙҚЫЗЫ.



Жарыстың салтанатты ашылуында облыс әкімінің орынбасары Руслан Рүстемов, ҚР Мәдениет және спорт министрлігі Спорт және дене шынықтыру істері комитетінің төрағасы, бокстан Әлем, Олимпиада чемпионы Серік Сәпиев сөз сөйлеп, қатысушыларға сәттілік тіледі. – Биыл Сыр өңірінің тарихында бірінші рет ерлер арасында бокстан Қазақстан Республикасының спартакиадасы өтуде. Бәсеке Сыр спортының дамуына серпін беріп, жасөспірімдердің боксқа қызығушылығын одан әрі арттыра береді деген сенімдемсіз. Ақпан айында басталған еліміздің V жазғы спартакиадасы спорттың 40 түрінен өтуде. Сыр елінде гандбол және бокс түрлерінен жарыстар өткізу жоспарланған. Спартакиада бағдарламасы бойынша ұйымдастырылған спорт түрлерінен Сыр спортшылары еркін күрестен жалпыкомандалық есепте 3-орынды иеленсе, гандболшыларымыз 1-орынды жеңіп алды. Алты

айға созылатын спорттық шара тамыз айында өз мәресіне жетпек.

Бүгінгі сайысқа қатысушыларға жақсы көңіл-күй, жоғары спорттық нәтиже, сәттілік пен рухани сергектік тілеймін, – деді облыс әкімінің орынбасары Р.Рүстемов. Мұнан кейін спартакиада ресми түрде ашылды.

Айта кетейік, бес күнге созылатын бастың жартылай финалы 6 мамыр күні, финалдық кездесу 7 мамырда өтетін болады.

Қазіргі таңда облыста бокспен 4000-ға жуық спортшы шұғылданады. Оның ішінде 18 балалар мен жасөспірімдер спорт мектебінде 2552 бала шеберлігін шындауда.

Айта кетейік, жуырда Таиландтың Бангкок қаласында өткен Азия чемпионатында еліміздің спортшылары 7 медаль алды. Олардың арасында жерлестеріміз Тұрсынбай Құлахмет алтын медаль иеленіп, еліміздің туын желбіретсе, Қамшыбек Қоңқабаев күміс жүлдеге ие болды.

ҰЛЫ ЖЕҢІСКЕ - 74 ЖЫЛ

Құлмановқа құрмет

Облыс әкімінің орынбасары Қуанышбек Ысқақов Ұлы Отан соғысының ардагері Бөрібай Құлмановты алдағы Жеңіс күнімен құттықтады.

Қуанышбек Ысқақов ардагермен сұқбаттасып, оған зор денсаулық, ұзақ өмір тіледі. Өз кезегінде Бөрібай аға мұндай ілтипатқа алғыс айтып, қазақстандықтарға бейбітшілік пен амандық тілейтінін жеткізді.

Бөрібай Құлманұлы 1920 жылы 6 маусымда Қызылорда облысы Сырдария ауданында дүниеге келген. Майданда Ржевск пен Привольжені азат етуге қатысқан, «Қызыл

Жұлдыз», «Еңбек Қызыл Ту» және «Құрмет» ордендерімен марапатталған.

Ігі дәстүр бойынша Ұлы Жеңіс күні қарсаңында мемлекеттік орган басшылары аймақ ардагерлерін мерекеміз құттықтайды. Сондай-ақ, мереке қарсаңында облыс әкімінің қатысуымен ардагерлерді дәстүрлі қабылдау өтеді деп жоспарланып отыр.



Облыста 25 Ұлы Отан соғысының ардагері және 4809 тыл еңбеккері тұрады. Осы жылы соғыс ардагерлері мен тыл еңбеккерлеріне материалдық және әлеуметтік көмек көрсетуге 404,4 млн теңге бөлінді. Оның ішінде Ұлы Отан соғысының ардагерлеріне 202 мың теңге, соғыс жылдарындағы ерен еңбегі үшін ордендермен және медальдармен марапатталғандарға 126 мың теңге, ҰОС кезінде 6 айдан астам жұмыс істегендерге 75 мың теңгеден көмек берілді.

«СБ» ақпарат.

КӘСІП

Бал арасын бағамын десеңіз...

Баған дейін басылым бетіне ара өсіруді дамытып, табыс тауып жүрген жаңақорғандық Орынбек Асылбаевтың шаруашылығы жайында танысудың сәті түсті.

Ержан ҚОЖАСОВ.

Ара демекші, бал арасын зерттеп тану қиынның қиыны. Белгілісі, адам денсаулығына мың дауасы бар. Бір ғана мысал, аранның қанатының суылы бізге байқалмаса да, онымен демалған адамға күш-қуат беретін қасиеті бар екен. Табиғатынан ерекше жаратылысқа ие жәндіктің өмір сүру қағидаты да тым бөлек. Сан түрлі гүл мен өсімдіктен түрлі қорек жинайтын бал араның емге шипа болар, адам денсаулығында маңызды рөл атқаратыны айтпаса да түсінікті.

Құмбазар ауылының тұрғыны Серік ақсақал 42 жыл ветеринария саласында абыройлы қызмет атқарып, зейнет демалысына шыққан. Зейнеттемінен деп қарап жатпағанға ұқсайды. Бұрыннан жалқаулыққа жаны қас ақсақал өзі қызығатын ара өсіру ісін қолға алған. Сөйтіп, облыстағы түрлі омарташылардан сабақ алып, 15 күндей арнайы курстарда оқыған көрінеді. Әбден ізденіп, жан-жақты саралаған соң, бар ынтасымен бизнес жоспар дайындапты. Онысын «Атамекен» кәсіпкерлер палатасына ұсынып, жобасы үздіктер қатарынан көрінген.

– «Даму» қоры арқылы 1 млн 275 мың теңге қайтарымсыз грант ұтып алған соң, 20 ұя «карпат» тұқымды ара мен бал өндіруге қажетті құрал-жабдықтарымды

сатып алдым. Қасыма көмекші ретінде бір жұмысшы бекіттім. Бастапқыда жергілікті ауа райы аралардың үйренісуіне қиындық туғызды. Сондықтан, оларды 20 күндей қолдан бал дайындап бақтым. Артынша, дарияға жақын апарып орналастырдым. Себебі, мұнда оларға азық боларлық шенгел, жиде, түрлі өсімдік гүлдеп жатыр, – дейді омарташы Серік.

Расымен де, аралар айрықша тіршілік иелері. Олар бір ұяда бір аналық, бірнеше жүз аталық және 100 мыңнан астам жұмысшы аралар өмір сүреді. Яғни, бір-бір әулет. Өз патшайымы, оның күтушісі мен күзетшісі болады. Бұдан бөлек, аранның ауыз қуысы кішігірім цех. Себебі, гүлден алған шырынды ұясына жеткенше ауыз қуысында балға айналдырады. Серік ағамыздың айтуынша, олардың басты жауы – көгершін, тышқан мен құмырсқа көрінеді. Аралар да бірнеше ауру түрлерімен ауырады. Тағы бір ерекшелігі, олар темекі мен ішімдіктің, этірдін иісін жақтырмайды. Жанына жақындаған адамнан осы иіс сезілсе, талап тастауға дейін барады. Сонымен қатар, үнемі қозғалыста болатын олардың ұяшықтарында қысы-жазы 30-35 градус температура сақталады екен.

Бүгінде Серік омарташының аралары бал жинау үстінде. Мамыр айының



ортасынан бастап тамыз айына дейін жиналған балды алуға мүмкіндік бар. Бір ұядан аптасына 6-7 келі бал алынса, бір маусымда 100-200 келіге дейін бал қолға тиеті деген сөз. Ал бұны, қаржыға айналырсаңыз, пайдасы жеткілікті. Міне, қол қусырып жүрген зінгіттей жігіттерге зейнеткердің үлгісі осындай.

Арал ауданы.

